



# ANISHINAABE GAYE / INAAKONIGEWIN ANISHINAABE JI-DIBA'AMAWIND ODAKIIMIWAA MAZINA'IGAN

Ekii'oshippihikatek kacakosich kiisis 2026



Gii-naanaagadawaabanjigaade Anishinaabewaki / diba'amaadiwin 23 ishkonginan ogii-naanaagadawaabandanaawaan maagizhaa gegoo da-onji-maazhise inamoog Miikana. **Da-dazhinjigaadewan** gaa-gikendaagwakin gekendamang aazha / ogii-naanaagadawaabandaanaawaan gaa-gikendaagwakin gekendamang eyaagin mii omaa ayaagin gaa-gikendaagwakin, mii imaa gaawin dayinamosinoon Miikana.

Miiwan onowe Anishinaabe gaa-ikidowaad ge-dazhindamang:

## Anishinaabe Inaakonigewinan:

Anishinaabe Inaakonigewinan Dibitaadiwinan, miiwan onowe genawendamowaad Anishinaabeg izhitwaawinan, epiitendamowaad owe Anishinaabewaki. Awegwenag igo da-izhaawag endazhi-dibaakonigeng, gemaa gaye aazhawaatebii'igeng, ji-naanaagadawaabandamowaad mazina'igan aazha inaakonigeyang.

## Oga-gaganoowaa Anishinaabeg Ji-wiindanokiindiwaad:

Anishinaabe Ishkoniganikaang ogii-dazhindaanaawaa enaabajichigeng Anishinaabewakiing, epiitendaagwak Anishinaabewaki, gii-aazhawaatebii'amaadiwag gaye, gii-izhaawag endazhi-dibaakonigeng.

## Weweni Gii-aginjigaade Mazina'igan Inaakonigewin:

Wemitigoozhi gii-inaabi aazhawaatebii'iganing gegoo ogii-mikaan gii-inendam.<sup>1</sup> Gii-waabanjigaade enigokwaag Anishinaabewaki minik gegoo imaa gechi-epiitendaagwakin, Anishinaabe inendamoonakonigewinan, mewinzha onowe onjiwan, izhichigewinan. Geyaabi gegoo ge-onji-gikendamang, omaa inaabin **Section 4.3.4** of Appendix O.

<sup>1</sup> Giishpin gegoo noondanziing aabajitoon, aazhawaatebii'igan gii-aabadad.

Onowe Gechi-apiitendaagwakin Omaa Akiing (gema zaaga'igan, ziibi endanaamiwaad giigoonyag endazhi-andawenjigeng owe onji oshki-miikana) mii omaa ji-naagwakin Anishinaabe izhitwaawinan Ozhichigaadeg Miikana:

### Mii Owe Anishinaabeg Enabajitoowaad Gidakiiminaang Anishinaabewitwaawin:

Maagizhaa gegooyan da-wanishkwechigemagad apii inamoog miikana, anishinaabewitwaawinan da-wanishkwechigaadewan.

### Geyaabi Go Ninga-mino-dazhiikaamin Anishinaabe Miinigoowiziwan:

Medwebidegin da-ozha'igemagadoon, maagizhaa gegoo da-meshkojisewan izhitwaawinan, giinawind ezhi-ganawendamang gidakiiminaang maagizhaa da-meshkojinaagwaad.

Endaso-ishkoniganikaa da-miinindim dibaajimomazina'igan (nashke owe mewinzha, anishinaabemowin, anishinaabe inendamoonakonigewin, anishinaabewitwaawin, enabadak gidakiiminaang, andawenjigewin, bagida'waawin, mashkikiwaatigoon, bimibizowin, endazhiikamang, wendinimang inaabandamowinan) maagizhaa inamoog Miikana da-wanishkwechigemagad enaadiziiyang. Gakina onowe ikidowinan da-miinaa wegimaawaadizid, gaawiin gakina awiya oga-waabandanziinan ogowe Anishinaabeg eta go.

## Aazha Onowe Gii-kiizhichigaadewan

Jibwaa-dagoshing Wemitigoozhi, Anishinaabeg eta go omaa gii-ayaawag gaye Omashkiigoog. Miziwe omaa *Anishinaabeg* gii-ayaawag zhaaganaashiiwakiing Anishinaabeg gii-izhinkaazowag. *Omashkiigowag* gii-izhinikaazowag omaa zhaaganaashiiwakiing gaye.

**Giiwedino Anishinaabeg** ogii-aabajitoonaawaa apii gegoo netaawiginging, anishinaabeg gii-ondanjigewag noopimiing gaa-ayaag wiisiniwan, wanii'igewin, giiwosewin, bagida'waawin, mawinzowin, miziwe gii-babaa-daawag ge-onji-mikamawaad wiisiniwin. Weweni gii-inaadiziwig ogii-kanawendaanaawaa wendinamowaad, wiisiniwin. Ogii-kikenimaawaa ezhi-odoodemiwaad gaawiin a'awe giijidoodem giwiidigemaasii weweni gii-bizindaadiwig waa-izhichigewaad. Anishinaabemowin apane gii-izhi-giigidowag, mii owe gaa-onji-bimaadiziwaad gaye ogii-wikongetoonaawaa gegoo, gakina gegoo. Weweni ogii-izhitoonaawaa owe aki weweni gaye Ogii-izhi'igoonaawaa.

**Omashkiigoog** gaye inake gii-izhi-bimaadiziwig ogii-aabajitoonaawaa apii gegoo netaawiginging, anishinaabeg gii-ondanjigewag noopimiing gaa-ayaag wiisiniwan, wanii'igewin, giiwosewin, bagida'waawin, mawinzowin, miziwe gii-babaa-daawag ge-onji-mikamawaad wiisiniwin. Mii go ge igiweg inake gaa-izhitwaawaad *Anishinaabeg*, weweni ogii-kanawendaanaawaa owe aki, gaye nibi, ogii-biminizha'aanaawaa gaye ezhi-odoodemiwaad. Ogii-kikendaanaawaa Anishinaabemowin, gaye aadizookewag, gaye wiikongewag apane, weweni izhitoonaawaa owe Aki.



Ashi-niizhwaaswi gii-izhibii'igaadeg gikinoonowin owe apii gii-tagoshing awe Wemitigoozhi ogii-wanishkwetoon, Anishinaabe bimaadiziwin. Wemitigoozhi ogii-adaawenan maanitaanan Hudson's Bay gii-izhinikaazo adaawewinini wemitigoozhiwag gii-mikanaakewag ge-izhaawaad gaa-wanii'igewaad. Anishinaabeg gii-meshkodoonigewaad niibiwa gegoo ogii-ondinaanaawaan geyaabajitoowaad wanii'igewaad, nawaj ge-ani-agaasiwag awesiinyag wemitigoozhi ogii-nisaan. Anishinaabeg gii-sanagi'aawag, andawenjigewinan apane gii-noondeyaapineshinoog. Mekodekonayenid ogii-wanishkwe'igoowaan onandanwenjiwiniwaa gii-onji'aawag.

Owe apii, gii-ayaawag gaye Wiisaakode anishinaabeg Wemitigoozhiwag ogii-wiijiwaawaa Anishinaabekweg. Mii omaa gaa-onjiwaad Wiisaakode Anishinaabeg wiinawaa ogii-ozhitoonaawaan odizhitwaawiniwaan, gaye odinwewiniwaa. Aanawi gabeya'ii gii-ayaawag, Anishinaabeg idash ogii-ikonizha'waawaa Wemitigoozhi ogii-kikenimaasii baamaa go naagaj.

Wemitigoozhi gaawiin apagindinaasii Anishinaaben ji-dazhikiikaminid ogii-wiikongewininiwaan. Mii owe izhinikaadegin inakonigewinan *Crown Lands Protection Act*, *Gradual Civilization Act*, *Gradual Enfranchisement Act*, gaye *the Indian Act* owe Wemitigoozhi ogii-gagwe-dibenimaan Anishinaabeg gakina gegoo ogii-kakwe-makamaawaa'. Miiwan onowe inakonigewin gaa-wanishkwechigemagakin, ogii-kakwe-makamaawaa' Anishinaabe inaadiziwin, aapiji go ogowe ikwegag. Gaawiin gaye ogii-pagindinaasii'aawaa' ji-babaa-ayaanid ogii-kakwe-wemitigoozhiinaadizii'aawaa'. Dibaa'amaadiwinan, gaye dibaa'amaadiwin 9 gaye Robinson Superior Treaty, gegaa go anishinaabe ogii-bagidendaanaawaan anishinaabewaki, wemitigoozhi ogimaa ogii-waniikaadaan anishinaabe dibaa'amaadiwin ogii-wanenimaawaa gaye Wiisaakode anishinaabe.

Bakaan gii-ani-izhinaagwad, aki ogowe onji wemitigoozhiwag anishinaabeg gaye gii-ani-meshkodendamoo, mii apii ozhichigaadegin ishkongiganan, anishinaabe gikinoo'amaadiwigamig, gaye ningodwaaswimidana apii gaa-gii-makanding. Nawaj geyaabi gegoo inakonigewinan gii-animookinaaginigewin Constitution Act of 1982 gii-dibaakonigeng gii-onji-nisidawinaagwad anishinaabe dibaa'amaadiwin, gaye anishinaabewitwaawinan, anishinaabemowin, mii owe apii gaa-ani-azhe-giiwewidamowaad anishinaabewaki. Aanawi go gii-sanagat gegoo, Anishinaabe ogii-gashkitoon odinaadiziwin gaye odinaakonigewiniwaan ogii-mookinaanaawaan.

## Mii Owe Gaa-inakamigak Gii-majji-dibaakonigeng



Bebakaan, izhinaagwadoon ezhi-bebakaanakin ishkongiganan *Anishinaabe / Inakonigewinan*: Mii owe *Gaa-inakamigak Mazina'igan*, mii owe waa-inakamigak mii owe ge-anikamigak bagamamoog Miikana da-inamong Miikana endaawaad awiyag.

Giishpin wii-gikendaman ge-meshkosegin anishinaabewitwaawinan Miikana, agindan mazina'igan gaa-dazhimindwaa awesiinyag, giigoonyag endanaamiwaad, gitigaanan, inamowin, mashkikiwaatigoonsan, nibi gaye akiing. Mii owe mazina'igan "ozhibii'igaadeg", ge-izhichigemagak bagamamoog Miikana, nashke owe da-bashkwa'igaade wiisiniwin gaa-ondinang anishinaabeg, gaawiin da-izhaasiwag omaa ezhi-ozhichigaadeg miikana, gaa-madwebidegin ozha'igonaawaan awesiinyag, bakaan ezhinaagwak gidakiiminaang, awiya da-ayaawag miikanaang.

Anishinaabe naanaagadawendamoo, aaniin apii ge gii-izhichigaadeg miikana, aaniin minik gegoo ge-meshkojisegin bagamamoog miikana, wegonen ge-meshkojinaagwak omaa ishkongiganing. Wemitigoozhi oga-gikendaan wegonen meshkojinaagwak: Aaniin

Ge-izhichiged Anishinaabe Aabajitood Miikana Da-anishinaabewitwaawin gaye Ge-izhi-ganawendang Anishinaabewitwaawinan gaye Ge-onji-mino-bimaadiziyang. Gikendaagwad, ji-meshkojisegin gegooyan omaa Ishkoniganing eta go *Anishinaabe Omiinigoowiziwinan / Gii-miinaawag Mazina'igan Anishinaabe Inakonigewinan gaye Ge-meshkojisegin.*

Ozhibii'igaadewan ge-dazhinjigaadesinook. Maagizhaa da-wanishkwechige miikana ono Anishinaabewitwaawinan. Nashke onowe: andawenjigewin, wanii'igewin, onjida go niigaan ji-wiindamawindwaa akawe; da-baashkineyaabitemon, da-ombiigwewebidan gegoo, ji-biisikaming gibishe'onan, maagizhaa da-ayaawan aazhoganan; da-meshkojinaagwad inaadiziwin. Ingoding igo da-ziiga'anjigaade miikana ge-onji-mino-ayaawaad awesiinyag gaye gitigaanan gaye giigoonyag nitam gaa-izhichigaade owe jibwaa-inamook miikana. Apii, izhichigewaad owe gaawiin aapiji da-wanishkwaachideyaasinoon aki, geyaabi gaa-ayaamagad anishinaabewitwaawinan.

## Mii Owe Ge-izhinaagwak Gii-kiizhamoog Miikana

Mii Owe Ge-izhinaagwak Gii-kiizhamoog Miikana—Anishinaabe oga-aabajitoonaawaa owe dazhiikamowaad / Anishinaabewitwaawinan—mii owe ge-izhiseg gii-izhendaagwak waa-izhichigewaad. Mii owe ge-izhichigewaad gaa-miikanaagewaad gemaa / gaye gaawiin gegoo da-wanishkweyaasiwag Anishinaabe ezhitwaawaad Miikana. Miiwan onowe maagizhaa ge-meshkojisegin, aaniin ge-inikwademook miikana, aaniind ina da-papakemanoon, aaniin ayaa pii ge-naanaagajichaadeg miikana. Maagizhaa meshkodendaagwad ezhichiged Anishinaabeg, maagizhaa bakaan da-inendaagwad gaa-dazhi-giiwoseng, owe gaa-izhinaagwak aki noongom maagizhaa da-bakaan inendaagwak, owe ezhitowaad anishinaabe gidakiiminaan.

Gakina gegoo gii-kiizhichigaadeg da-ozhibii'igaadewan Mazina'iganing Ishkwaaj. Aanind igo gegoo da-wanaajichigaade maagizhaa bangii eta go Miikana, aanind ingoji gaawiin da-ayaasinoon andawejigewin, bizaan maawiin igo oga-dazhiikaanaawaa anishinaabe ezhitwaawaad.



## Gakina Gegoo Ge-meshkojisegin

Gakina gegoo ge-meshkojisegin aanawi go gakina gegoo naanaagadawendaamin ge-meshkojisegin weweni ningii-naanaagajitoomin gegoo. Maagizhaa onowe da-izhisewan naagaj omaa miikanaang, maagizhaa moona'aabikwaan, giishka'aakwewin, waasiganeyaab, naanaa'ichigaade miikana. Maagizhaa miiwan onowe ge-wanishke'igoowaad bagamamook Miikana, maagizhaa meshkodendamoo anishinaabeg enaabajitoowaad gidakiiminaang, gaye izhiwaawinan obimaadiziwiniwaa. Gakina onowe da-ozhibii'igaadewan gaa-gii-meshkojisegin, omaa ishkwaaaj mazina'iganing, maagizhaa da-ozhimowag awesiinyag, epiitwewebidegin gegoo oga-ozhindaanaawaa, maagizhaa gaawiin omaa da-ayaasiiwag ge-giiwosewindawindwaa, gaye wanii'igewin, bagida'waawin, mawinzowin, bimiwayaawin gaye dazhiikamang da-anishinaabewitwaawin.



Gakina onowe gaa-gii-dazhinjigaadegin da-miinaawag Ishkwaaaj Dibaajimomazina'igan da-miininidim.



## Awashime na kiwiikikentan?

Giishpin nawaj geyaabi gegoo wii-gikendamang, weweni gidaa-agindaan ji-gikendaman Aaniin Gemeshkojishkaag / Gidakiiminaang Mazina'igan.

### Kekanonach Wiintamakewinan

Kinantomiko ima cishayan akwaaahkiink tashiikewinik miikana kapimanokiitamowach anapii piko wiikakweteyan kayema wiipakitinaman ikitowin.

Piiwapikonk: [eaisinput@martenfallsaccessroad.ca](mailto:eaisinput@martenfallsaccessroad.ca)

Kitowinik: 1-800-764-9114

Piiwapik: [eais.martenfallsaccessroad.ca](http://eais.martenfallsaccessroad.ca)

